

皇朝藩部要略

皇朝藩部要略卷之十七

前史官壽陽 祁韻士 纂

寶山 毛嶽生 編次

江陰 宋景昌 校寫

平定 張穆 覆審

西藏部要略一

西藏卽唐古特。別稱土伯特。凡四部。曰衛。曰藏。曰喀木。曰阿里。轄城六十餘。衛在四川打箭鑪西北。諺稱前藏。其首城曰拉薩。藏。在衛西南。諺稱後藏。其首城曰日喀。紫喀木。在衛東南。其首城曰巴塘。阿里居藏極西。有城。

曰達克喇距岡底斯山三百餘里西南微地漸高至岡底斯山而極其西北有僧格喀木布諸山亘阿里北二千餘里入喀齊部境東北有諾木汗烏巴什諸山環衛地達西甯凡六千餘里西南有們那克尼爾諸山亘阿里南二千餘里入額訥特珂克境額訥特珂克卽古天竺國也東南有達木楚克喀木布諸山亘藏衛達喀木凡七千餘里禹貢曰導黑水至于三危衛藏喀木統爲三危喀拉烏蘇經其地入海蒙古謂黑曰喀拉謂水曰烏蘇在唐宋爲吐番元明卽烏斯藏地俗喜浮屠法設紅黃二教以冠別尤重黃教達賴喇嘛班禪喇嘛掌之

代理藏務者曰噶卜倫。次日代奔。次日西爾奔。次日尙
卓特巴。分理兵刑財賦。其治民者曰宗奔。戶五出兵一。
賦納達賴喇嘛。市打箭鑪地。貢道由西甯入。達賴喇嘛
班禪喇嘛使稱堪布。噶卜倫使稱囊素。喀拉烏蘇設堪
布喇嘛一。穆魯烏蘇設蒙古宰桑一。司郵務。唐古特西
南。布魯克巴拉達克巴勒布諸國。道遠不自至。因達賴
喇嘛納貢。達賴喇嘛居拉薩。曰布達拉。布達拉與普陀
音近。普陀山有三。一在浙江定海縣。一在額訥特珂克
之南海。一在唐古特。卽達賴喇嘛居。別有伊克昭。巴罕
昭。相傳布達拉爲吐蕃贊普建牙所。伊克昭爲唐文成

公主建巴罕昭爲吐番妻他國女建。今猶存唐長慶中與吐番定盟碑。及文成公主所事佛像。班禪喇嘛居日喀紫。曰札什倫布。唐古特謂如來相曰昭。大曰伊克。小曰巴罕。福壽曰札什。須彌曰倫布。以示慶也。達賴喇嘛班禪喇嘛。明宗喀巴二大弟子。宗喀巴興黃教。弟子數千人。達賴喇嘛位居首。其名曰羅倫嘉穆錯。說者謂羅倫嘉穆錯而前。行教額訥特珂克巴勒布。唐古特諸境。凡五十一世。率荒邈難稽。自羅倫嘉穆錯而後。世以化身掌黃教。一世曰根敦珠巴。二世曰根敦嘉穆錯。始立第巴。代理所部事。三世曰索諾木嘉穆錯。卽明時所稱。

活佛鎖南堅錯也。明懲唐吐番亂。思制御之。永樂中。封番僧爲大寶法王。大乘法王。大慈法王。闡教王。顯教王。化教王。贊善王。護教王。凡八王。並給敕印。成化中。大寶法王來朝。遣內監以鹵簿送之。不達而返。索諾木嘉穆錯時。諸番僧莫不俯首稱弟子。四世曰雲丹嘉穆錯。五世曰阿旺羅卜藏嘉穆錯。卽所稱第五輩達賴喇嘛也。喀爾喀及厄魯特部長敬禮之。有藏巴者。爲唐古特汗。居日喀紫。第巴奉達賴喇嘛居拉薩。不相能。

本朝崇德二年。喀爾喀三汗奏請發幣使。延達賴喇嘛。

四年厄魯特使繼至因

賜書達賴喇嘛

五年

遣使往達賴喇嘛所以喀爾喀有違言不果

七年達賴喇嘛班禪喇嘛偕藏巴及厄魯特顧實汗圖魯拜琥遣使貢方物達盛京表稱

曼珠師利大皇帝義取文殊佛號且切音與滿洲近也今歲獻丹書克如之使至

賜宴

命諸王貝勒宴如次留八閱月

八年。

遣使存問達賴喇嘛。稱金剛大士。復

賜書班禪喇嘛。給銀幣器物有差。會第巴乞兵厄魯特。稱藏巴虐部眾。蔑釋教。顧實汗自青海擊之。事聞。

賜敕顧實汗。復

諭藏巴曰。爾稱佛國護法。遣使上書。邇聞爲厄魯特所敗。特賜函緘。嗣當修好。勿絕。藏巴尋爲顧實汗所戕。初藏衛及青海巴爾喀木皆隸唐古特。顧實汗襲青海據之。令巴爾喀木納賦。復侵藏衛。陽崇釋教。陰自強。給地達賴喇嘛。班禪喇嘛。遣長子達延轄其眾。號鄂齊爾汗。

第六子多爾濟佐之號達賴巴圖爾台吉。

順治三年達賴喇嘛顧實汗各遣使貢金佛念珠。

賚甲冑弓矢皮幣。

四年達賴喇嘛班禪喇嘛表頌

功德獻方物。

五年烏斯藏闡化王遣僧索諾穆拉什來貢。

賜妙聖慧智灌頂國師號。

遣使召達賴喇嘛。

六年達賴喇嘛奏明年歲在寅俟辰年入覲。

九年壬辰正月達賴喇嘛以行期聞鄂齊爾汗使從。

遣官迎。

詔定正副貢使賞例。十二月，達賴喇嘛入覲，獻方物。

賜宴南苑。

詔建黃寺居之。是年，明烏斯藏暨長河西魚通甯遠董卜韓胡諸指揮宣慰司獻敕印，請內附。

十年正月。

賜宴達賴喇嘛于太和殿。

賚金幣鞍馬。二月。

詔和碩親王碩塞率八旗兵送達賴喇嘛至岱汗。四月，遣官齎金冊印封達賴喇嘛爲西天大善自在佛，領天

下釋教。普通鄂齊賴達喇達賴喇嘛。

十三年。闡化王遣僧嘉穆錯諾爾布等貢方物。先是索諾穆拉什至。

詔闡化王納明所給敕印。比年凡四遣使。至是獻舊王印一。及敕書。稱闡化王舊爲土伯特國主。藏巴襲之。顧實汗戕藏巴。以闡化王歸。達賴喇嘛轉給第巴。第巴因有闡化王敕印。詭遣邊內安島人。稱闡化王貢使。

詔改授闡化王敕印。復

賜書達賴喇嘛。詰第巴罪。

十七年。達賴喇嘛班禪喇嘛鄂齊爾汗表貢方物。

遣官存問

賚雕鞍玉壺等物

十八年達賴喇嘛請市茶北勝州

允之

康熙九年鄂齊爾汗卒

賜賻祭子朋素克嗣號達賴汗

十四年達賴喇嘛遣使代逆藩吳三桂乞降

敕曰吳三桂初叛時朕遣使往諭喇嘛大兵分路進剿

若吳三桂竄赴唐古特當卽擒獻喇嘛奏稱吳三桂曾

取延打木結達木二城乃三噶爾瑪地今旣發兵攻取

防守沿邊若欲徵兵深入惟候詔旨達賴巴圖台吉已
自唐古特遣赴青海令其有事相援無事則鈐東部眾
朕思喇嘛崇尚信義必如所奏而行因以青海蒙古進
兵故傳諭滇蜀二省達賴巴圖台吉辭松潘路險未卽
赴喇嘛又奏稱蒙古兵雖強得城池恐貪據且西南地
熱風土不宜若吳三桂勢窮悔罪乞免死允降吳三桂
背恩謀逆罪不容誅朕豈容伊爲裂土罷兵請又靖逆
將軍張勇等奏稱青海蒙古入邊侵擾蓋以叛鎮王輔
臣倡亂甯羌故也今西陲已晏然無事喇嘛宜恪守前
言令達賴巴圖爾台吉等統轄部眾毋得滋事擾民

二十二年達賴喇嘛示寂第巴匿不奏嗣是殘喀爾喀及噶爾丹就滅皆第巴爲之噶爾丹幼棄家依達賴喇嘛後歸準噶爾詭言達賴喇嘛授已博碩克圖汗號以所居阿爾台鄰喀爾喀收謀侵之未幾喀爾喀右翼札薩克圖汗成袞與左翼土謝圖汗察琿多爾濟構釁達賴喇嘛遣札爾布柰定盟察琿多爾濟不從成袞子沙喇懇于

朝

敕達賴喇嘛擇使善輯喀爾喀達賴喇嘛奏唐古特以噶爾旦西勒圖爲尊遣之往蒙古謂喇嘛坐牀者爲西

勒圖。蓋喇嘛大弟子也。而喀爾喀哲卜尊丹巴呼圖克圖亦奉

詔赴盟壇與議。哲卜尊丹巴呼圖克圖者。土謝圖汗弟也。偕噶爾旦西勒圖集喀爾喀兩翼汗濟農諾顏台吉宣

諭定盟。噶爾丹偵哲卜尊丹巴呼圖克圖與噶爾旦西勒圖並坐。詰責之。因構兵。土謝圖汗不敵。偕哲卜尊丹巴呼圖克圖挈部內附。

上以喀爾喀厄魯特奉達賴喇嘛教。

申命遣使罷兵。第巴煽噶爾丹侵喀爾喀。索哲卜尊丹

巴呼圖克圖。

二十九年。噶爾丹詭爲達賴喇嘛表。偕唐古特厄魯特汗台吉。請上

尊號。

諭曰。朕聞喀爾喀部兄弟不睦。遣使達賴喇嘛。諭令兩翼歸好。達賴喇嘛遣噶爾旦西勒圖往。不能仰體朕心。及達賴喇嘛意。雖已和喀爾喀。而喀爾喀與厄魯特相仇之故。實從此起。後聞交惡興戎。卽遣使達賴喇嘛所。達賴喇嘛遣齊緝克塔賴堪布等往。卒不能諭止之。聽其縱戰。喀爾喀爲所敗。朕復遣使達賴喇嘛所。諭令定

盟息兵。達賴喇嘛遣濟隆呼圖克圖。朕遣伊拉古克三呼圖克圖往說之。詎意伊等不行諭止。反令闖入邊汛。朕出兵問罪。伊等立視其戰。我軍不得已而擊之。致厄魯特敗遁。朕與達賴喇嘛期于撫育衆生。而使臣故違意旨。至于如此。如能令厄魯特與喀爾喀修好。朕尙欲加達賴喇嘛嘉號。此皆任事行人不能仰副朕心。及達賴喇嘛意。致喀爾喀殘破。厄魯特喪敗。朕心實爲隱痛。復何尊號之可受乎。其以是諭達賴喇嘛及諸汗台吉等。來使貢物。著并發還。

三十年。以收撫喀爾喀全部。

諭達賴喇嘛知之。

三十二年達賴喇嘛使至有巴圖爾額爾克濟農和囉理者青海和碩特族也游牧西套避噶爾丹侵來歸。

賜居阿拉善尋叛復悔罪至策妄阿喇布坦爲噶爾丹從子修怨噶爾丹第巴忌之奏和囉理安置青海保無盜賊虞厄魯特衆半附策妄阿喇布坦若生亂端何以禦之唐古特舊市打箭鑪請勿禁聽內地民與蒙古互市。

敕曰和囉理以困窮來歸朕優恤之使居阿拉善乃忘朕豢養恩妄生猜疑奔竄他所今窮而復歸朕復宥罪

安置并無欲得其利欲用其力之心也。今爾欲和囉理游牧青海何不卽遣人遷往。爾又言策妄阿喇布坦恐生亂端。目前并無妄爲之事。苟有此等事端其時自當從公裁度。爾又奏打箭鑪交市之事。殆欲屯戍意也。爾與朕一道同風。歷年已久。如爾設立駐防朕必量增戍卒。况我內地兵丁約束甚嚴。未嘗私出邊境。爾但嚴禁屬眾戍兵之設可無用也。達賴喇嘛尋奏年邁事皆決第巴請給之爵。

詔封第巴爲土伯特國王。以達賴喇嘛辭異前奏遣使往察不得狀。

三十四年

諭召班禪喇嘛來朝第巴與噶爾丹陰阻之

三十五年班禪喇嘛使至稱避痘達賴汗奏貽書勸赴召不之從會

上親征噶爾丹俘降眾得第巴奸狀

諭達賴喇嘛班禪喇嘛知之復

敕獎達賴汗曰爾自顧實汗以來與本朝和協同心專尚宗喀巴道至汗身益誠信不渝頃噶爾丹陽護宗喀巴法陰爲悖逆邪行朕親統大兵剿滅之第巴乃達賴喇嘛下司事之人反不遵達賴喇嘛教惟爾汗敬待朕

使豫以噶爾丹事奏聞。朕知爾不忘舊好甚堅且專。凡悖壞教法煽誘噶爾丹者。爾汗殆知之。特遣使往以示褒善貶惡之意。

敕責第巴曰。爾陽奉宗喀巴教。陰與噶爾丹比。以久故之達賴喇嘛詐爲尙存。遣濟隆呼圖克圖至噶爾丹所。烏蘭布通之役。爲擇戰日。朕遣人往召班禪喇嘛。爾又謂噶爾丹將要殺之。不遣行。青海博碩克圖濟農與噶爾丹結姻。又不舉發。爾果能改過。仍思遵宗喀巴道。奏明達賴喇嘛已故始末。尊奉班禪喇嘛。使赴朕召。執獻濟隆呼圖克圖及博碩克圖濟農子所娶噶爾丹女。朕

仍待汝以尊崇禮。不然。朕必問爾欺達賴喇嘛助噶爾丹罪。爾向對朕使言。四厄魯特爲爾護法主。爾其召四厄魯特助汝。朕將觀何如也。

三十六年。第巴疏詭稱達賴喇嘛存。令其使尼麻唐呼圖克圖密奏達賴喇嘛示寂。恐唐古特生變。故隱期。今第六世靜體已十五年。乞

念唐古特眾勿遽宣。

遣理藩院主事保住等齎

敕諭曰。朕數年來。久知達賴喇嘛已故。今爾輸誠密奏。朕不欲摘發隱私。傾人家國。嗣當益加恭順。勿違朕旨。

保住等行。我使自策妄阿喇布坦所歸。言西北諸厄魯特。知達賴喇嘛示寂久。第巴阻策妄阿喇布坦兵。令勿剿噶爾丹。復煽青海諸台吉私盟。

詔保住等往視新達賴喇嘛。嚴詰第巴罪。第巴奏策妄阿喇布坦自撤兵。非臣阻。青海諸台吉懼噶爾丹侵備兵盟。第六世達賴喇嘛尚坐禪。濟隆呼圖克圖請勿壞身命。班禪喇嘛將赴召。噶爾丹女乞仍給博碩克圖濟農子。

賜敕詰責。濟隆呼圖克圖尋械至。禁之。班禪喇嘛奏學淺不敢赴召。博碩克圖濟農子察罕丹津奏。請免獻噶

爾丹女乃

允之是年達賴汗遣使慶征噶爾丹捷子拉藏以建達賴喇嘛塔故赴青海聞

上招撫使至偕諸台吉內附達賴汗卒拉藏嗣第巴惡之初第巴與策妄阿喇布坦讐噶爾丹旣滅第巴策妄阿喇布坦畏

天朝威各卑詞乞命然皆貌恭順懷不靖志策妄阿喇布坦詭遣使赴青海聲言兵擊第巴奏第巴壞宗門敎禁班禪喇嘛僞立達賴喇嘛名羅卜藏琳沁策旺嘉穆錯者惑諸蒙古恐將滋變

上燭其奸

諭廷臣曰策妄阿喇布坦由博囉塔拉至土伯特必經喀拉烏蘇等處路徑險惡斷不能往若悉眾大舉則附近哈薩克布魯特諸部相仇殺無留護妻孥者若兵單力弱斷難成事惟有奮激而行妻孥與俱幸濟則已否則有歸附土伯特之謀耳其意特張虛聲欲觀青海動靜未必果欲爭戰也策妄阿喇布坦果寢兵第巴計毒拉藏不死以兵逐之拉藏因集唐古特眾執殺第巴奏至

敕封輔教恭順汗

諭獻第巴所立達賴喇嘛使至策妄阿喇布坦遣人往迎拉藏不予復不以獻

諭曰達賴喇嘛存日六十年來塞外不生一事及身故後第巴誘噶爾丹妄行不靖朕觀奏詞非復昔日語氣遣使細訪乃盡得欺詐狀蒙古素崇佛教有達賴喇嘛名皆皈嚮之倘爲策妄阿喇布坦所迎歸則西藏蒙古皆向策妄阿喇布坦矣拉藏今雖不從朕命後必執之來獻

四十六年拉藏汗獻第巴所立達賴喇嘛羅卜藏琳沁策旺嘉穆錯道死復立博克達之阿旺伊什嘉穆錯爲

達賴喇嘛。初唐古特人。索諾木達爾札。其妻曰羅卜藏。吹木索。有子二。長羅卜藏噶勒藏嘉穆錯。次恭格丹津。羅卜藏噶勒藏嘉穆錯。幼慧甚。唐古特衆。及青海諸台吉。敬事之。拉藏汗旣立。博克達之阿旺伊什嘉穆錯。爲達賴喇嘛。聞其名。忌之。將以兵戕。索諾木達爾札襁負走。乃免。青海諸台吉。以不辨眞僞爭。

詔遣官往視。拉藏汗奏以班禪喇嘛言。置禪榻。王大臣等議。拉藏汗與青海諸台吉隙。請遣官理藏務。

詔侍郎赫壽往。

四十九年。班禪喇嘛拉藏汗奏。阿旺伊什嘉穆錯。諳經。

典。青海諸台吉信之。請給冊印。

詔封第六世達賴喇嘛。撒赫壽歸。青海諸台吉。許拉藏汗辭誣。以裏塘之羅卜藏噶勒藏嘉穆錯爲眞達賴喇嘛。瑚畢勒罕。

詔詢班禪喇嘛。如拉藏汗言。青海諸台吉復固爭。上以不輯之將構難。

遣官檄集盟壇。示班禪喇嘛印文。

諭徙羅卜藏噶勒藏嘉穆錯置內地。以索諾木達爾札護居西甯宗喀巴寺。青海貝勒察罕丹津。台吉羅卜藏丹津等。稱避痘。不宜遠行。初議送紅山寺。繼請送西甯。

皇朝通志卷一百一十一
宗喀巴寺卒不遣且以兵脅異已者

詔大軍備之乃懼送羅卜藏噶勒藏嘉穆錯至宗喀巴寺

五十六年偵準噶爾潛兵赴藏

詔赫壽遺書拉藏汗曰將軍富甯安等擒準噶爾哨卒言拉藏汗子娶策妄阿喇布坦女已三年且生子策妄阿喇布坦遣其將策凌敦多卜及托卜齊都噶爾三都克等率兵往阿里克或策妄阿喇布坦兵至俱未可定爾旣受我

主封食我

主祿而侵我邊部。我川兵三萬餘。豈有聽爾臨諾。穆汗
烏巴什穆嚕烏蘇境。侵青海之理乎。彼時助察罕丹津
等與爾戰。悔無及矣。蓋拉藏汗自仇殺第巴後。使貢不
絕。策妄阿喇布坦忌之。語哲卜尊丹巴呼圖克圖使拉
藏汗。嗜酒無謀。詭議姻。拉藏汗子三。長噶爾丹丹忠。次
索爾札。次色布騰。策妄阿喇布坦以女博托洛克爲噶
爾丹丹忠婦。來娶。留不遣。

上聞之。

諭歸拉藏汗子。不從。西域謂善巫蠱者曰鮚荅。噶爾丹
丹忠習其術。策妄阿喇布坦誘縛之。夾兩金間。烙死。遣

兵六千襲藏。詭稱噶爾丹丹忠及博托洛克歸。拉藏汗前以爭達賴喇嘛與青海諸台吉違言。事甫定。準噶爾兵赴藏。

上疑之。或拉藏汗煽策妄阿喇布坦構兵也。青海尋以準噶爾侵拉藏汗告。

詔荊州太原駐防兵赴成都西安。以署西安將軍額倫特屯西甯。都統和禮屯雲南。護軍統領溫布屯打箭鑪。侍衛色楞宣。

謫青海諸台吉備兵。時策凌敦多卜率準噶爾眾由特幾斯踰淨科爾庭山。拉藏汗不之備。賊至達木。始覺。偕

子索爾札拒不敵奔守布達拉遣使齎疏乞援賊誘噶
卜倫沙克都爾札卜唐古特合吉納木札勒等開布達
拉門入戕拉藏汗拘色布騰及宰桑等禁阿旺伊什嘉
穆錯于札克布里廟索爾札率兵三千餘潰走爲所擒
其妻間道來奔

詔安置博囉充克克優養之

五十七年拉藏汗疏始至

詔額倫特色楞往援失利從兵或爲準噶爾所掠策凌
敦多卜復誘裏塘營官喇嘛等赴藏裏塘外日布巴塘
而察木多而乍雅而巴爾喀木皆距近

五十八年都統法喇奉

詔屯打箭鑪奏裏塘至唐古特咸敬瑚畢勒罕請移打箭鑪兵屯裏塘相機剿準噶爾復令索諾木達爾札諭營官喇嘛等使知駐兵裏塘乃

聖主保護瑚畢勒罕鄉眾至意裏塘外諸境可傳檄定詔可乃進屯裏塘第巴色布騰阿住達瓦喇木札木巴等抗不就撫誅之傳檄巴塘察木多乍雅各籍其土及民數復

詔自打箭鑪進屯巴塘策凌敦多卜懼送所掠兵自巴爾喀木歸言唐古特時有瘴準噶爾難久處羅卜藏噶

勒藏嘉穆錯唐古特衆僉稱爲眞達賴喇嘛。若置禪榻善甚。

命撫遠大將軍固山貝子允禩宣

諭青海台吉等。從大將軍入藏。羅卜藏噶勒藏嘉穆錯奏。隨地可置禪榻。興大兵。恐擾衆。王大臣等以藏地遠且險。不決進兵議。

五十九年

諭曰。策凌敦多卜聞我師至。自必望風遠遁。俟定立法教後。或暫留兵守視。或久鎮其地。唐古特衆皆如我兵。準噶爾至。以逸待勞。何難剿滅。西甯至四川雲南境外。

土番錯處。西藏皆土番族。若策凌敦多卜侵據藏地。唐古特衆。卽爲準噶爾兵。邊疆土番。復安能保全耶。喀爾喀及青海俱服朕風化。準噶爾乃侵據藏地。青海台吉。理應棄命忘身。乃口稱維持黃教。乏實心效力人。朕思策凌敦多卜兵。遠道衝雪。尙能至藏。我兵獨不能赴乎。此時若不安藏。賊益無所忌憚。安藏大兵。決宜前進。詔封羅卜藏噶勒藏嘉穆錯爲宏法覺衆第六世達賴喇嘛。

賜金冊印。以護軍統領噶爾弼爲定西將軍。都統延信爲平逆將軍。率青海及內札薩克喀爾喀阿拉善兵。護

達賴喇嘛行。噶爾弼自拉里進。擊準噶爾年桑春丕勒。於章來爾戎抵墨朱工喀。第巴達克咱喇嘛鍾科爾等迎降。集皮船渡宣。

諭大小第巴及各寺喇嘛。封達賴喇嘛倉庫。斷賊糧道。唐古特人康濟爾集唐古特兵偵賊走多特。追擊之。斬獲甚眾。誅所置喇嘛總管等。延信自青海進。敗準噶爾于卜克河。齊諾郭勒綽瑪喇賊由克底雅遁。軍抵藏。出阿旺伊什嘉穆錯於禁所。廢之。蓋自第五世達賴喇嘛示寂後。幾四十年。第六世達賴喇嘛始定。先是準噶爾賊未至藏。

遣理藩院主事勝住喇嘛楚爾沁藏布喇木占巴等往
圖地域至是大兵入諸番內附。

上以山川名漢番異稱。

命大學士九卿等詳考西南徼外輿地。

六十年敘唐古特迎降功封第巴康濟鼎阿爾布隆固
山貝子隆布爾輔國公理前藏務頗羅爾札薩克一等
台吉理後藏務各授噶卜倫。

御製平定西藏碑建伊克昭文曰昔者

太宗文皇帝崇德七年班禪額爾德尼達賴喇嘛顧實
汗謂東土有

聖人出特遣使自人跡不至之區經仇敵之國閱數年始達盛京至今八十載同行善事俱爲施主頗極安甯後達賴喇嘛之歿第巴隱匿不奏者十有六年任意妄行拉藏滅之復興其法因而允從拉藏青海羣衆公同之請中間策妄阿喇布坦妄生事端動準噶爾之衆肆行奸詐滅壞達賴喇嘛并廢第五輩達賴喇嘛之塔辱蟻班禪毀壞寺廟殺戮喇嘛名爲興法而實滅之且欲竊據土伯特國朕以其所爲非法爰命皇子允禔爲大將軍又遣朕子孫等調發滿洲蒙古綠旗兵各數萬歷烟瘴之地土馬安然而至賊衆三次乘夜盜營我兵奮

力擊殺賊皆喪膽遠遁一矢不發平定西藏振興法教賜今瑚畢勒罕冊印封爲第六輩達賴喇嘛安置禪榻撫綏土伯特僧俗人衆各復生業于是文武臣工咸謂王師西討厯瘴癘險遠之區曾未半載輒建殊勲實從古所未有而諸蒙古部落及土伯特酋長亦合詞奏曰皇帝勇畧神武超越往代天兵所臨邪魔掃蕩復興蒙古向所尊奉法教喀木藏衛等部人衆咸得拔離湯火樂土安居如此盛德大業非臣下頌揚所能宣罄請賜御製碑文鐫勒昭地以垂永久朕何功焉而羣衆勤請不已爰紀斯文立石西藏俾中外知達賴喇嘛等三朝

恭順之誠。諸部落累世崇奉法教之意。朕之此舉。所以除逆撫順。綏眾興教云爾。

雍正元年。

詔給第六世達賴喇嘛冊印。文視第五世達賴喇嘛。別賜敕司噶卜倫務。

二年。大軍討青海叛賊羅卜藏丹津。誅助逆喇嘛等。

諭曰。喇嘛助羅卜藏丹津爲逆。糾數千餘眾。以致追剿覆滅。玷辱法教甚矣。前準噶爾據唐古特。戮僧徒。燬寺廟。大軍往討之。恢復昭地。法教振興。如此隆恩。不知感激。反助悖逆。尚可謂遵奉法教者乎。其以此諭喇嘛等。

知之

三年撤大軍還以康濟爾總藏務阿爾布巴副之王大臣等奏阿里形勝地康濟爾既駐藏請令擇代理阿里務者康濟爾遵

旨議以其兄喀錫爾色布登喇什爲阿里總管撫遠大將軍年羹堯請令康濟爾專居藏地

上察阿爾布巴等與康濟爾異志

諭曰若令康濟爾孤身在藏阿爾布巴等不之服康濟爾雖欲效忠勢必不能仍令兩處往來行走兼理藏及阿里務爲善先是達賴喇嘛赴藏索諾木達爾札偕行

既娶隆布爾女二隆布爾恃達賴喇嘛姻忌康濟爾諸
噶卜倫由是不相能川陝總督岳鍾琪奏打箭鑪外裏
塘巴塘乍雅察木多中甸請隸內地給頭目等土司職
察木多外魯隆宗雜哇坐爾剛桑噶吹宗袞卓諸部距
打箭鑪遠內地遙制不便請隸唐古特以噶卜倫康濟
爾阿爾布巴理之
遣副都統鄂齊往
諭達賴喇嘛

四年鄂齊奏達賴喇嘛幼康濟爾恃績蔑視諸噶卜倫
阿爾布巴隆布爾等陰險黨札爾爾附之恐構達賴喇

麻與康濟鼐不睦。請罷隆布鼐札爾鼐翦阿爾布巴翼。諭達賴喇嘛偕康濟鼐阿爾布巴和衷。有袞都阿喇木巴者。羅卜藏吹木索弟也。善翼視達賴喇嘛。

賜達爾漢號復

詔設駐藏大臣。以副都統瑪拉內閣學士僧格往。

五年。瑪拉等至藏。阿爾布巴隆布鼐札爾鼐陰以兵戕康濟鼐。叛遣賊黨侵阿里。喀錫鼐色布登喇什以義不反兵。驟擊之。戰歿。其長子噶錫巴納木札勒色布騰從。台吉頗羅鼐集後藏兵拒賊卻走。將往擊之。馳奏乞援。詔左都御史查郎阿率兵萬五千餘赴藏。亂作。瑪拉等

以諾顏和碩齊轄喀拉烏蘇兵護唐古特眾奏請
賜爵。

詔授札薩克一等台吉。

六年頗羅鼐謀大軍將至集後藏及阿里兵九千自潘
玉口馳赴前藏聞瑪拉等駐拉薩護達賴喇嘛遣兵助
召諸寺喇嘛擒阿爾布巴隆布鼐札爾鼐等送瑪拉所
查郎阿至誅阿爾布巴等及其孥請留兵二千駐藏徙
達賴喇嘛居裏塘。

允之以札薩克貝子頗羅鼐領後藏務轄阿里岡底斯
境。

諭給銀三萬。賞從兵。頗羅鼐請以車校旺札勒協理藏務。

詔授札薩克一等台吉。兼噶卜倫查郎阿將撤大軍還。奏舊設噶卜倫理前藏務。今藏地初定。頗羅鼐爲眾服。請令兼領前藏。從之。

諭曰。前用兵西藏時。頗羅鼐甚爲效力。其後噶卜倫等嫉妬爭權。阿爾布巴隆布鼐等潛結匪類。公然肆惡。擅殺朝廷敕封貝子總理事務之康濟鼐。并欲害及頗羅鼐。頗羅鼐奏聞逆黨罪狀。朕遣大軍領兵前往。察詢情

由分別治罪頗羅爾聞大軍將至率眾奮勇前馳直抵藏地阿爾布巴等力屈勢窮被各寺喇嘛擒獻大臣至彼盡得悖逆妄亂之情已將阿爾布巴及叛逆等盡行殲誅自此黃教可興番眾可輯頗羅爾深知大義討逆鋤奸俾無辜受害者得雪沈寃背惡肆行者早正刑辟甚屬可嘉著封爲固山貝子以獎義勇以昭國憲上憫康濟爾無嗣

詔追授其兄喀錫爾色布登喇什爲一等台吉長子噶巴納木札勒色布騰襲爵

賞孔雀翎

詔徙達賴喇嘛居裏塘。索諾木達爾札代達賴喇嘛來朝奉表貢物。

賜珊瑚頂、雙眼孔雀翎。復

諭曰：索諾木達爾札訓示達賴喇嘛學習經典，保護多方。西藏諸務，毫不干預，甚屬可嘉，著封爲輔國公。岳鍾琪奏移化林兵五百往護，復以兵四百屯噶達西吹音堡，及鴉籠江上中下三渡，尋徙泰甯。四川總督黃廷桂奏泰甯距打箭爐道險，舊屯兵五百，不給防禦，請增兵如數，令與西藏裏塘巴塘互犄角。

從之。大軍之討阿爾布巴，噶爾丹策凌使至，奏請赴藏。

煎茶

上不允

七年達賴喇嘛至裏塘建噶達寺居之將

遣兵討準噶爾

諭曰策妄阿喇布坦假黃教爲名潛兵入藏無故殺拉藏汗遣使往討復敢阻兵抗命其後策妄阿喇布坦身故子噶爾丹策凌遣使至奏稱欲使眾生樂業黃教振興噶爾丹策凌不過一微末台吉此豈伊應出語耶且西藏阿爾布巴隆布爾札爾爾等濟惡同謀皆以準噶爾鄰伊地青海叛賊羅卜藏丹津係伊等姻戚彼此相

依窘迫時必往投之。頗羅鼐勇往直前。截賊去路。阿爾布巴等未得前進。輒被擒。準噶爾若仍留游牧。將來青海及西藏地。必受其害。此朕所熟思而審處者也。

八年。僧格偕頗羅鼐。以兵千五百。屯騰格里諾爾。以頗羅鼐子珠爾默特策布登統阿里諸路兵。防準噶爾賊。保唐古特。

詔授札薩克一等台吉。

九年。一等台吉噶錫巴納木札勒色布騰表謝。

恩。獻方物。

諭曰。前以喀錫鼐色布登喇什陣亡。阿里經頗羅鼐奏。

請特贈一等台吉。其子噶錫巴納木札勒色布騰襲之。邇聞爲國效力，辦理事務亦善，且爲康濟爾兄子。康濟爾宣力有年，抒誠報效，始終不懈，并無子嗣。著將噶錫巴納木札勒色布騰格外施恩，封授輔國公。世襲罔替。尋授噶卜倫布魯克巴部諾顏琳臣齊壘喇布濟喇嘛札爾西里布魯克顧濟噶碧棟嚕布等納貢。

諭曰：朕爲天下主，一視同仁，無分中外。乃者附近帕爾城之布魯克巴人等，起釁構兵，互相讐殺。朕聞之，甚不忍。頗羅爾仰體朕意，與班禪喇嘛遣使往諭朝廷恩德。布魯克巴人等感悟，息爭敬順，無違。且請施恩訓誨。朕

甚嘉悅。嗣此恪守疆界。共相和睦。永遵釋教。祇奉恩綸。朕日益加優眷。復以頗羅鼐招撫功。

詔晉封多羅貝勒。總理衛藏噶卜倫務。

諭嘉札薩克一等台吉珠爾默特策布登奮勇效力。晉封輔國公。

賜敕印。班禪喇嘛尋偕頗羅鼐助駐藏軍糧。瑪拉卻之。復固請。

詔給如值。以軍餉足。不煩獻助宣。

諭先是準噶爾掠索爾札色布騰禁之。哲卜尊丹巴呼圖克圖說策妄阿喇布坦獻謝罪。不從。子噶爾丹策凌

嗣給索爾札戶十。詭稱將遣歸唐古特。頗羅鼐聞之以告。

諭曰。準噶爾戕拉藏汗。掠其子索爾札等歸。今稱遣還西藏。不可不嚴爲防備。前策妄阿喇布坦遣策凌敦多卜襲西藏時。誑稱噶爾丹丹忠偕其女歸。乘拉藏汗不備。襲唐古特地。今遣歸索爾札之言。正噶爾丹策凌奸計。若唐古特少爲玩忽。卽蹈前策凌敦多卜故轍矣。準噶爾旣殺拉藏汗。豈肯令其子索爾札歸藏。襲爵唐古特。現有訓練蒙古兵。爾其與駐藏大臣等定議。設汛阿里哲斯肯。圖魯克勒底雅等處。協力防禦。準噶爾若以

兵隨索爾札至。可卽迎擊之。索爾札父兄被人殺害。焉有不忿恨之理。若果思報仇。感戴朕恩。率屬來歸。爾等自可悉心安頓。至若立汗之事。當令達賴喇嘛班禪喇嘛奏聞于朕。方可建之。豈可令噶爾丹策凌任意妄行。久之。索爾札不至。後大軍定。準噶爾色布騰及索爾札子納噶察始來歸。附收察哈爾旗。

十年。拉達克汗德忠納木札勒奏。臣理國事。尊釋教。偵準噶爾情。輒以告。乞

賜恩綸。

敕曰。爾父尼瑪納木札勒偕貝子康濟鼐同心報效。前

已大沛恩膏。今爾亦效爾父。與貝勒頗羅鼐一體效力。甚屬勤勞。嗣當益加屈勉。以紹前徽。僧格奏巴勒布部雅木布車稜庫庫木三汗慕

聖德。遣貢請覲。

上憫其道遠。

敕曰。爾汗慕朕仁化。萬里輸誠。朕甚嘉悅。納所進方物。第念道路遙遠。往返維艱。爾使卽由西藏遣歸。爾汗但與貝勒頗羅鼐協力和衷。維持黃教。以副朕普育羣生至意。

十一年。

諭曰西藏駐劄弁兵本爲保護唐古特衆防範準噶爾設比來賊衆敗竄不能復涉藏地頗羅鼐抒誠效力唐古特兵皆訓練壯勇目今藏地無事兵丁多集米穀錢糧雖給自內地唐古特不無解送勞苦量留守藏兵五百餘盡撤還前令達賴喇嘛移駐秦甯因唐古特有阿爾布巴等事恐準噶爾乘間來犯其從至弟子久違鄉土各懷歸志班禪喇嘛現復年邁有疾著仍遷達賴喇嘛歸藏

十三年輔國公索諾木達爾札從達賴喇嘛歸藏

皇朝藩部要略卷之十八

前史官壽陽 祁韻士 纂

寶山 毛嶽生 編次

江陰 宋景昌 校寫

平定 張穆 覆審

西藏部要略二

乾隆元年布魯克巴部諾顏琳臣齊壘喇布濟等奉表貢札薩克一等台吉諾顏和碩齊卒駐藏副都統瑪拉等奏偕頗羅鼐議代領喀拉烏蘇兵者頗羅鼐子珠爾默特納木札勒歲領塔木騰格里諾爾兵防汎塔木距

喀拉烏蘇邇可令兼轄諾顏和碩齊所遺札薩克一等台吉其弟車臣哈什哈現理古木布木務請令襲爵允之

三年拉達克汗遣獻方物各

賜敕獎

四年駐藏副都統杭奕祿奏巴勒布三汗邇構兵臣遣頗羅鼐諭輯之咸聽命獻所部民數

詔優賚復以頗羅鼐績晉封多羅郡王噶爾丹策凌請赴藏煎茶

諭曰朕爲天下大君不阻奉教之人爾準噶爾前曾潛

往藏地。擾害土伯特眾。今若徑赴彼地。土伯特或懷憤
滋事。爾果誠心布施。朕當遣兵護往。旣而準噶爾煎茶
使道棟科爾以爭市值。不果往。

詔責違信罪。噶爾丹策凌遣謝。固申前請。

允之。是年。輔國公一等台吉噶巴納木札勒色布騰卒。
弟班第達襲。

五年。札薩克一等台吉車臣哈什哈卒。弟齊旺多爾濟
襲。

八年。準噶爾煎茶使至藏。謂頗羅鼐曰。聞拉達克言土
伯特黃教盛。今信然。噶勒招穆倫河濱舊設溫都遜喇

嘛禪樹噶爾丹策凌乞代葺準噶爾乏諳經典喇嘛乞
給我攜歸聞唐古特不善騎且乏軍械今觀之武備稍
勝頗羅龜語之曰

大皇帝闡黃教輯眾生以故土伯特富庶甚爾等至藏
煎茶賞馬駝路費令極裕此皆恭順

天朝所致土伯特以準噶爾襲始嚴武備我蒙

恩統藏務簡兵繕械有侵圉者足禦之矣所請修廟延
僧事非奉

旨安敢擅行準噶爾使唯而退

諭獎頗羅龜應使得體

賚幣。噶爾丹策凌忌之。訐頗羅鼐不善理煎茶務。諭曰。頗羅鼐奏準噶爾眾有侵害土伯特讐喇嘛等。不願前往。故不之給。爾奏頗羅鼐念拉藏汗仇。辦給爾使諸物。俱未協。朕爲大君。不分內外。頗羅鼐與爾等皆僻處遠地。彼此互有違言。朕豈肯偏聽爾。遽罪頗羅鼐乎。復

詔駐藏副都統傅清等。偕頗羅鼐議防準噶爾。珠爾默特策布登以兵五千駐防阿里克。

九年。準噶爾使自藏歸。珠爾默特策布登班第達齊旺多爾濟以協頗羅鼐理準噶爾煎茶務。並

賜幣獎珠爾默特策布登會病足自阿里歸藏是年輔
輔國公索諾木達爾札卒

諭曰索諾木達爾札係達賴喇嘛父

皇考加恩達賴喇嘛特予封爵伊亦深感

皇考恩行走謹慎歷十有餘年著加恩令伊子恭格丹
津仍襲輔國公爵以示優眷

十年

詔駐藏大臣三年一代札薩克一等台吉齊旺多爾濟
卒駐藏副都統傅清等奏頗羅鼐請以諾顏和碩齊子
旺對襲

諭曰。伊係舉家受恩之人。令其辦理諸務。自爲有益。諾顏和碩齊受國厚恩。授爲札薩克一等台吉。伊弟相繼承襲。亦各奮勉效力。今齊旺多爾濟病故。著照所請。以其兄諾顏和碩齊子旺對承襲札薩克一等台吉。

十一年。

諭頗羅鼐曰。爾素效忠誠。勤勞懋著。自朕御極以來。悉心靖共。凡事竭力奮勉。辦理妥協。甚屬可嘉。著加恩于爾子內封一長子。日後承襲王爵。總理藏務。所係甚要。其善擇才堪嗣爾。悅服眾心。裨益公務者。以聞。頗羅鼐子二。長珠爾默特策布登。次珠爾默特納木札勒。珠爾

默特策布登病足。以長子讓弟。珠爾默特納木札勒詭讓兄。頗羅鼐愛少子。請以珠爾默特納木札勒爲長子。允之。

上嘉珠爾默特策布登之讓。

諭曰。珠爾默特策布登。雖有疾。前曾出兵效力。著加恩封鎮國公。頗羅鼐善服眾。爲諸噶卜倫所敬事。有綏奔喇嘛札克巴達顏者。書其名。瘞詛之事。覺頗羅鼐欲弭變。輕議綏奔喇嘛札克巴達顏罪。

上嘉之。

諭鎮壓左道不足患。其偕達賴喇嘛協輯唐古特眾。

十二年珠爾默特策布登疾痊駐藏副都統傅清等請遣屯阿里克汎

允之準噶爾使再入藏煎茶駐藏副都統傅清等遣車稜旺札勒以喀拉烏蘇兵三百監之遣旺對領兵設汎阿哈雅克阿里克路班第達協頗羅鼐總理諸務頗羅鼐卒

遣官賻祭以珠爾默特納木札勒襲郡王爵兼理衛藏噶卜倫務

諭傅清曰珠爾默特納木札勒不更事或未服唐古特眾且頗羅鼐以暴疾亡珠爾默特納木札勒或以緩奔

喇嘛札克巴達顏故與達賴喇嘛構隙不肖眾起而問之。不無滋事虞。爾其留意體察。導珠爾默特納木札勒任用舊人。復以協理藏務。當如頗羅鼐存日。宣諭眾噶卜倫知之。會準噶爾台吉策妄多爾濟納木札勒復遣使赴藏煎茶入寺。詭避痘。以已卒守門。不令官兵從。上以準噶爾狡甚。

飭嚴防。雖歸巢勿稍忽。珠爾默特納木札勒奏藏地謐無事。請撤官兵歸。

上念頗羅鼐有安藏功。且蒙恩厚。珠爾默特納木札勒必無異志。不從撤兵請。適滋疑。不如示之信。

詔可。

諭達賴喇嘛。嗣勿令準噶爾入藏。雖固請弗允。珠爾默特納木札勒。詭稱準噶爾眾襲唐古特。至碩翁圖庫爾。遣兵備喀拉烏蘇。徙達木番眾不數旬。揚言準噶爾至。阿哈雅克自率兵往備。駐藏提督索拜遣旺對赴喀拉烏蘇備之。比至無蹤。

上聞之。

詔噉喀拉烏蘇兵及達木番歸牧。勿惑眾。

十三年。準噶爾使自藏歸。諸噶卜倫並

賜幣獎。

詔授班第達兄噶錫巴納木札勒色布騰子巴桑車凌
爲一等台吉。

諭曰。昆弟子姓。世受國恩。嗣益勉無怠。初郡王頗羅鼐
以女妻班第達。頗羅鼐卒。班第達察珠爾默特納木札
勒有逆志。不之附。珠爾默特納木札勒惡之。釋其孥。

十四年。駐藏副都統紀山劾珠爾默特納木札勒妄戾。
請檄珠爾默特策布登至協理藏務。

上不允。

諭紀山善導之。勿露防範迹。已而珠爾默特納木札勒
以珠爾默特策布登發阿里兵將擾藏告。益計陷之也。

敕諭珠爾默特策布登爾父子昆弟受朕恩深重。爾所素知。爾今無故發兵。是旣負朕恩。又玷辱爾父矣。爾於兄弟之間。素敦和好。爾父爵尙讓爾弟襲。今乃轉欲搆兵取罪。果爾兄弟不睦。宜親身至藏。以實情告辦事大臣。及達賴喇嘛。俟奏至。朕議爾兄弟事務。令永遠和睦。如爾有欲奏言。亦卽具奏。朕自有措處也。復

諭傅清曰。珠爾默特納木札勒年幼躁急。性好滋事。若果無他故。其兄欲進兵至藏。是特兄弟間互相侵犯耳。若其兄並無此事。而伊造言誣構。則宜相機辦理。

十五年。珠爾默特納木札勒以兵戕其兄珠爾默特策

布登于阿里。詭以兄暴疾聞。請收葬。并育兄子。

上允之。時珠爾默特策布登子朋素克旺布及珠爾默特旺札勒皆居後藏。珠爾默特納木札勒以兵往戕朋素克旺布。陽稱逃亡。珠爾默特旺札勒奔札什倫布。依班禪額爾德尼爲喇嘛。乃免。駐藏都統傅清左都御史拉布敦以珠爾默特納木札勒攜兵離藏告。蓋是時珠爾默特納木札勒忌其兄珠爾默特策布登襲殺之。私攜礮至後藏。誣籍噶卜倫輔國公班第達及第巴布隆贊等。旋達木距前藏三百餘里。擁眾二千餘。不歸。奏至上。上不忍。卽誅之。

諭曰此或珠爾默特納木札勒以部眾不皆順擁兵自護且或因弟兄啟釁懼朕問罪妄意離巢穴可苟免此時惟應靜以鎮之待其自起自止在我原無治罪之心則彼亦不生猜疑之念也嗣傳清等密疏叛狀

詔俟副都統班第自青海赴藏討罪復

諭四川總督策楞提督岳鍾琪等馳兵往會而是時賊猖盛梗驛道軍書不達者旬日傳清偕拉布敦計不急誅賊必據唐古特爲變召珠爾默特納木札勒至待諸樓甫登起責其罪曰爾違

天子命且忘爾父無君無父罪不可赦傳清趨前扼其

臂拉布敦拔佩刀刺之。諭脇從罔治。有羅卜藏札什者。趨下呼賊千餘突至。聚圍樓。集藁焚。達賴喇嘛遣番僧往護。不得入。傅清拉布敦死之。先是傅清等將除珠爾默特納木札勒。密與班第達謀。羅卜藏札什乘亂。攪帑二萬餘挺走。班第達復奔告達賴喇嘛。集兵捕逆。翼日擒禁之。遣番眾屯要汛。諭勿傷漢民。抗官軍。達賴喇嘛善之。奏令班第達暫理藏務。時四川總督策楞等赴藏定亂。

諭曰。班第達不能救護。駐藏大臣念其勢孤力弱。尙屬無過。然亦無功可錄。但不附逆黨。猶知尊向天朝。著以

輔國公爵。管理噶卜倫務。應俟徐加恩賜策楞既就道。又

諭曰。此措置唐古特一大機會也。若經理得宜。自可永遠甯謐。否則久復別生事端。珠爾默特納木札勒敢懷逆志。萌于地廣兵強。事權專一。嗣此唐古特應多立頭目。以分其勢。爾等其詳議善後事宜。爲一勞永逸計。策楞等至藏。磔珠爾默特納木札勒子達爾札策楞及羅卜藏札什。奏傅清拉布敦誅逆被害狀。

上召諭廷臣曰。從前頗羅鼐實心恭順。料理藏中事務。一切安帖。

皇考世宗憲皇帝屢次加恩由台吉封爲貝勒伊感激我朝厚恩彌益恪誠朕卽位以後封爲郡王後因頗羅鼐年力就衰朕詢伊二子之中孰堪爲嗣伊奏稱長子賴弱又已出家二子珠爾默特納木札勒人尙強幹能勝彈壓因令其承襲迨伊奏事一二次以後朕于其辭意之間卽知其非伊父居心可比日後必生事端諭駐藏大臣留心體察傳清前經駐藏爲伊等所信服遂令前往且慮其勢孤益以拉布敦協同駐藏乃珠爾默特納木札勒心益狡悍將長兄珠爾默特策布登圖害又與達賴喇嘛素有仇讐旣戕其兄遂欲計害藏中不順

伊之班第達等其勢將延及達賴喇嘛獨居其地雄長一方近遂將塘汛文書禁絕不通悖逆情形漸益昭著傳清拉布敦稔知其奸疏請便宜從事以絕後患於今年十月初八日奏到朕以僅二大臣孤懸絕域未可輕舉批令候班第更換拉布敦到藏日會同達賴喇嘛及藏中大噶卜倫等明正其罪以申國法乃傳清等未及接到諭旨卽于十月十三日傳珠爾默特納木札勒到通司岡加以誅戮而傳清拉布敦旋爲伊屬羅卜藏札什所害總督策楞奏到朕深爲憫惻不覺涕零因思傳清拉布敦若靜候諭旨遵行或不至是但珠爾默特納

木札勒反形已露。倘不先加誅戮。傅清等亦必遭其荼毒。則傅清拉布敦之先幾。籌畫殲厥渠魁。實屬可嘉。非如霍光之誘致樓蘭而斬之也。夫臨陣捐軀。雖奮不顧身。然尚迫以勢所不得不然。如傅清拉布敦揆幾審勢。決計定謀。其心較苦。而其功爲尤大。以如此實心爲國之大臣。不保其令終。安能不倍加軫悼耶。傅清拉布敦著加恩。追贈爲一等伯。入祀賢良昭忠祠。春秋致祭。傅清並入伊家祠。從祀伊等子孫。給與一等子爵。世襲罔替。以示朕褒忠錄庸之至意。並將伊二人爲國捐軀之大節。明白宣示。使天下共知其不得已之苦心。否則好

事喜功者。借此二人爲口實。而事外之無知人。又議其擅開邊釁。而仍邀國家如此厚恩者。朕豈有令其是非倒置若此哉。

十六年。方亂時。有清特古斯者。屯兵阿里。助珠爾默特納木札勒爲逆。班第達誅之。遣台吉集都鼐理阿里務給卓理克圖號。事聞。

諭策楞等曰。班第達擅給台吉號。儼以藏王自居。今令管理噶卜倫務。復命多立數人。班第達或大失所望。雖未必顯有抗違。但其心稍恐不足。務須明切導之。以珠爾默特納木札勒恃有王爵。擁勢太重。釀成嫌隙。今多

立噶卜倫正可保全終始令彼渙然疑釋庶可永甯策
楞抵藏奏達賴喇嘛以鎮阿里要地必重名號故權給
之班第達恭順可信臣遵

旨宣諭感且泣矢竭誠報效策楞等以珠爾默特納木
札勒通準噶爾逆書聞

諭曰前駐藏都統傅清左都御史拉布敦因珠爾默特
納木札勒逆謀顯著先事翦除奮不顧身忠誠卓越俱
已加恩贈卹入祀賢良昭忠二祠傅清並入伊家祠從
祀不知者或訾二人冒險邀功且議朕爲酬庸過厚也
今據策楞班第等奏珠爾默特納木札勒自立名號潛

遣其心腹通款準噶爾稱策妄多爾濟納木札勒爲汗
且求其發兵至拉達克地方以爲聲援幸值準夷內潰
遣使人回藏被獲得其逆書並餽敵諸物是其陰蓄異
志勾結準夷罪不容誅設非二臣協力同心決計先發
則其遺害藏地將不可言是二臣之心甚苦而其有功
于國家甚大應特建雙忠祠合祀二人春秋致祭丕昭
勸忠之典復

御製雙忠詩紀之有雙忠蹟列傳斯篇他年以待信史
編之句是年策楞等議設駐藏兵五百防汛兵千自咱
拉山至拉卜賽郡木自阿哈雅至碩翁圖庫爾各設汛

哨以達木番歸駐藏大臣轄視內地例置佐領驍騎校各職每年一察視設噶卜倫四以輔國公班第達札薩克台吉車稜旺札勒色玉特色布騰喇嘛尼瑪嘉穆錯任之別設代奔五第巴三堪布一分理藏務隸駐藏大臣及達賴喇嘛轄唐古特正副二使均歸達賴喇嘛四噶卜倫附以達勿私遣

允之

勅四噶卜倫曰西藏廣興黃教爲清淨善地達賴喇嘛掌管西方釋教廣演經法從前供養喇嘛一切事務原設噶卜倫四人至珠爾默特納木札勒諸事擅專不與

諸噶卜倫商議負恩任性潛懷異圖因此駐藏大臣將
伊正法噶卜倫事務不可一人專辦特令策楞等簡選
賢能仍照舊例分設噶卜倫四員公同辦事爾等當咸
戴朕恩尊敬達賴喇嘛和衷協力屢勉供職勿存私意
致生猜疑勿分彼此互相瞻顧遇有重務稟知達賴喇
嘛與駐藏大臣等遵奉指示而行爾等其感恩宣力副
朕興黃教安羣生至意準噶爾台吉喇嘛達爾札等請
赴藏煎茶延唐古特喇嘛
上不允喇嘛達爾札復因拉達克汗致書唐古特達賴
喇嘛責勿擅請

十七年珠爾默特納木札勒既誅

上念珠爾默特策布登功不忍絕其爵

詔珠爾默特旺札勒襲輔國公喇嘛達爾札遣申前請
上仍不允

詔議防藏地班第等奏準噶爾通藏隘有阿里那克桑
騰格里諾爾阿塔雅克四路那克桑路稍近已設汛拉
達克距阿里近雖與準噶爾互市必不令兵入境葉爾
羌亦可通阿里中有大山隔之且阿里距藏兩月餘聞
賊至易備惟騰格里諾爾阿哈雅克路較闊亦俱嚴設
汛唐古特有馬兵萬餘步兵萬五千若準噶爾自騰格

里諾爾阿哈雅克至。則令車稜旺札勒以蒙古唐古特兵禦之。微衮布達克布等番兵援。由阿里那克桑至。則令色玉特色布騰以近牧兵禦之。檄阿里兵援。班第達及尼瑪嘉穆錯留藏。護送達賴喇嘛。至班禪喇嘛駐札什倫布。距前藏七百餘里。值用兵。令移居前藏。若準噶爾傾眾至。則移達賴喇嘛班禪喇嘛至泰甯。以駐藏官軍及唐古特兵屯要汛。待大兵援。

允之。準噶爾使久不至。

諭達賴喇嘛嚴備。復定議西自阿里。東至喀拉烏蘇。增雜拉沙木等十三汛。

二十年大軍討準噶爾擒台吉達瓦齊。

諭唐古特部知之達賴喇嘛獻銅佛三慶捷。

詔納會阿睦爾撒納叛擾伊犁。

詔唐古特復設汛。

二十二年第七世達賴喇嘛示寂。

二十三年阿睦爾撒納走死逆回布拉呢敦霍集占等復叛據葉爾羌喀什噶爾。

詔勿撤唐古特汛。

二十四年拉達克汗謀定邊將軍兆惠取烏什阿克蘇等城將抵葉爾羌奏請助剿回逆。

諭曰爾遠處邊地感戴恩澤朕鑒爾忱深爲慰悅大軍
進剿回逆凡所克城俱設兵駐防今布拉呢敦霍集占
力窮勢蹙必將棄巢遠遁朕不以出兵擒剿事責爾倘
逆回竄入爾境爾當擒獻藏所朕必優加恩賚若不遵
奉諭旨異日朕必知之非爾益也是年大軍定葉爾羌
喀什噶爾霍集占等竄巴達克山

詔拉達汗勿復遣偵巴達克山尋函獻霍集占首

詔撤唐古特汎西陲蓋自此永定

二十八年授輔國公恭格丹津爲噶卜倫札薩克一等
台吉車稜旺札勒卒孫索諾木旺札勒襲

二十九年

欽定西域同文志

御製烏斯藏卽衛藏說曰藏地處蜀與滇之徼曰藏云者非華言實番言也番又或謂之唐古特今班禪額爾德尼所居實稱藏達賴喇嘛所居實稱衛元明時有烏斯藏朵甘衛指揮諸司之名或以爲異於衛藏而不知實同也蓋嘗以唐古特文字詳覆互證乃知烏斯藏卽衛藏其音其義無不一以貫之也且以音言斯蓋薩之餘音滿字爲薩音半字爲斯音唐古特收音之斯字卽與國書之伊字收音通則烏斯之切爲衛如烏伊之切

爲衛也。亦猶阿伊之爲愛。噶伊之爲該。喀伊之爲開也。國書斯字伊字。雖各爲收音。然唐古特收音字。無伊字。而有斯字。由烏斯推之。而愛亦阿斯。該亦噶斯。開亦喀斯。何不通之有。若夫衛藏之爲義。則衛蓋彼言中也。非華言置衛之謂也。以烏合斯爲衛音。而中義藏則切匝阿爲藏音。而其義則淨之謂也。唐古特老若幼。無不知之。今以不識唐古特文字之人。而與一二譯出華言中。辨其是非。豈非嚼蠟哉。或又曰。衛旣以中爲義。則今之所謂前藏之說何居。曰。此更非唐古特之本有。而興於今之華言也。然以今日疆域言之。自打箭鑪取道。由東

南迤及西南先經喀木次衛次藏是全藏形勢固宜前
喀木而後藏而衛適其中處之地喀木之木爲半字音
應從喀字而其義則邊界之謂也今稱前後藏者則因
二地有達賴喇嘛班禪額爾德尼居之而達賴喇嘛位
居長遂並以藏屬之更易中爲前而今自京都目之且
統以爲西藏云耳然則烏斯藏之卽爲衛藏不愈信哉
夫藏之內屬肇自元代言譯展轉沿薩爲斯原無岐舛
惟文士墨守蠹簡旣不克兼諳西竺之書而彼中服習
梵文者又豈能筆授心通取腹地史乘傳譌一一悉爲
釐訂毋惑乎攷文之難也予因輯同文志類次西藏所

隸爲系三合切音者特揭是說以發其凡

三十六年

詔建布達拉於避暑山莊左肖衛式初厄魯特崇黃教
噶爾丹策凌建都綱于伊犁河濱北曰固爾札南曰海
努克設西勒圖四集喇嘛千餘以塔本集賽輪值瞻之
蒙古謂五爲塔本謂輪值爲集賽每歲首及盛夏台吉
宰桑等以瞻禮至後固爾札爲阿睦爾撒納所燬大軍
定準噶爾亂

詔如固爾札式建安遠寺于避暑山莊北隅以準噶爾
台吉達什達瓦屬來歸者居其側青海厄魯特及喀爾

喀杜爾伯特諸台吉。值班秋覲。輒

命瞻禮。至是布達拉落成。土爾扈特汗渥巴錫和碩特台吉恭格等挈數萬眾來歸。

詔瞻禮之。蓋以綏靖荒服。非惟闡揚黃教爲也。

三十八年。授札薩克一等台吉索諾木旺札勒爲噶卜倫。噶木倫輔國公恭格丹津卒。子札什納木札勒襲索諾木旺札勒。由穆魯烏蘇助金次所需物。

賜幣獎。

四十二年。札薩克輔國公珠爾默特旺札勒卒。子諾爾布朋素克襲。

四十四年班禪喇嘛奏請入覲祝
釐。

詔建札什倫布于布達拉左肖藏式。

四十五年五月。

駕南巡旋班禪喇嘛使伊什巴爾珠布等迎。

覲于趙北口。

命觀龍舟水嬉六月。

幸承德府。

駐蹕避暑山莊班禪喇嘛使穆占巴等齋輜重至。

詔居札什倫布旁舍時盛暑仍服氍毹。

詔賜紗葛并

給銀及藥物。七月，班禪喇嘛至。舊例以達賴喇嘛班禪喇嘛有高行。

諭旨至，始下牀入。

覲，惟令跏趺不拜。至是，班禪喇嘛固請拜。

上嘉其誠敬，聽之。

賜宴萬樹園。

詔瞻禮布達拉。八月，行。

萬壽慶典。班禪喇嘛稽首頌無疆。九月，班禪喇嘛扈蹕旋。

賜宴南苑以香山昭廟藏工

詔慶讚之班禪喇嘛自崇德時通貢至是凡三世初封
曰羅卜藏吹吉嘉穆錯次日羅卜藏伊什皆

勅賜班禪額爾德尼號次日羅卜藏巴爾丹伊什如之
是役也以不召至跋涉三萬餘里入覲蒙古內札薩克
四十九旗及喀爾喀厄魯特諸部汗三公台吉聞之莫
不歡忭舞蹈執役觀

慶典十一月班禪喇嘛示寂

勅於所居建清淨化城

四十六年送舍利歸藏復

遣官齋金冊印封羅卜藏丹巴旺舒克札木巴勒嘉穆錯爲達賴喇嘛時其父第巴阿木布木前卒

諭曰第六世喇嘛羅卜藏噶勒藏嘉穆錯之父索諾木達爾札曾封輔國公今新達賴喇嘛已賜冊命其父已故未及授封其兄索諾木達什爲哲卜尊丹巴呼圖克圖父著授輔國公爵如索諾木達爾札例索諾木達什尋卒

詔以哲卜尊丹巴呼圖克圖弟喇布丹納木札勒襲四十八年理藩院議奏索諾木達什以達賴喇嘛故封輔國公爵子喇布丹納木札勒繼襲嗣若仍予世襲則

與來歸有功之蒙古王公等無別。請俟喇布丹納木札勒出缺後停襲。嗣有似此者皆令承襲一次。

詔如議。

詔札薩克輔國公諾爾布朋素克、札薩克一等台吉索諾木旺札勒、札薩克一等台吉索諾木喇什、咸世襲罔替。理藩院議俟輔國公札什納木札勒出缺後停襲。

諭曰：索諾木達賴爾札以生達賴喇嘛故，封輔國公爵。伊子孫承襲二次。今達賴喇嘛示寂，若其父所遺世爵竟爾裁汰，朕心實爲不忍。如仍世襲公爵，于例又屬難行。朕念達賴喇嘛俟札什納木札勒出缺後著加恩賞

給一等台吉。世襲罔替。并著爲例。永遠遵行。

四十九年。

遣官齋玉冊印。

賜達賴喇嘛復

敕封班禪喇嘛之瑚畢勒罕。爲班禪額爾德尼。以幼未
賜名。

五十三年。巴勒布賊侵西藏界。侍郎巴忠奉

命赴藏查辦。奏索諾木旺札勒素向巴勒布商賈勒索
狀。

諭曰。索諾木旺札勒平素旣向巴勒布商賈勒索。巴勒

布賊人侵藏之事。卽係伊激成。伊身若在。必當從重治罪。今伊業已病故。雖不加深究。但不當仍令其子承襲。札薩克台吉索諾木旺札勒之札薩克一等台吉著停其承襲。以示懲儆。

謹案 先大夫自訂年譜云乾隆四十七年充

國史館纂修官先是奉

旨創立蒙古王公表傳武進管先生幹貞纂傳數篇奉
差離館時無錫相國嵇文恭公爲總裁知余諳習清文
派令接纂是書余旣任事通核立傳體例計內札薩克
凡四十九旗外札薩克若喀爾喀土謝圖汗車臣汗札
薩克圖汗賽因諾顏若青海若阿拉善若土爾扈特多
至二百餘旗以至西藏及回部均應立總傳分傳羌無
故實文獻奚徵雖有鈔送旗冊雜亂糾紛卽人名亦難
卒讀無可作據乃悉發大庫所貯清字紅本督閱搜查

凡有關於外藩事蹟者概爲檢出以次覆閱詳校擇其緊要節目隨閱隨譯薈萃存作底冊以備取材每於灰塵空積中忽有所得如獲異聞積累既久端緒可尋於是各按部落條分縷析人立一傳必以見諸

實錄紅本者爲準又以西北一帶山川疆域必先明其地界方向恭閱

皇輿全圖譯出山水地名以爲提綱其王公等源流支派則核以理藩院所存世譜訂正勿訛如是者八年而書始成時與余同修此書者惟檢討郭可之在達一人耳云云 先大夫旣成表傳一百十二卷進呈

御覽爲今著錄四庫之

欽定外藩蒙古回部王公表傳底冊數十秩未經更事
釐訂藏之家篋五十餘年幸無失墜逮寓藻奉

命視學江蘇駐節江陰武進李申耆前輩見而好之因
屬寶山毛生甫先生爲參攷編輯江陰宋勉之補表成
書二十二卷題曰藩部要略從西陲要略例也又越七
年平定張石州復爲校補譌脫乃墨諸版石州又以先
大夫之勅爲各傳也先辨其地界方向譯出山水地名
以爲提綱而是編疆域未具讀者眩之爰以會典一統
志爲本旁采各書別纂爲蒙古游牧記若干卷它日卒

業將附梓以行道光二十五年歲次乙巳五月男甯藻
謹記